

# → PEMULIHARAAN TASIK CHINI



[FOTO LUQMAN HAKIM ZUBIR/BH]



[FOTO FARIZUL HAFIZ AWANG/BH]

Najib melepaskan benih anak ikan sambil diperhatikan Wan Junaidi (lima dari kiri) dan Adnan (dua dari kiri) pada lawatan kerja ke Pusat Penyelidikan Tasik Chini di Pekan, semalam, manakala gambar kanan, Najib mendengar penerangan daripada Ketua PPTC, Prof Datuk Dr Mushrifah Idris.

## Kerajaan komited jaga rizab UNESCO

BERITA HARIAN PEMULIHARAAN TASIK CHINI M/S 3 16 OKT 2016

### → Perdana Menteri lancar Kompleks Makmal Air Tawar Tasik Chini

Oleh Abdul Razak Raaff, Nik Sukry Ramli dan Amin Ridzuan Ishak  
bhnews@bh.com.my

► Pekan

**P**elancaran Kompleks Makmal Air Tawar Tasik Chini dan Pusat Penyelidikan Tasik Chini (PPTC) semalam, adalah bukti komitmen kerajaan dalam memulihara dan memelihara tasik berkenaan sebagai Rizab Biosfera Pertubuhan Bangsa-Bangsa Bersatu Ba-

gi Pendidikan, Kebudayaan dan Saintifik (UNESCO).

Kompleks yang dibina Majlis Pembangunan Wilayah Pembangunan Ekonomi Pantai Timur (ECERDC) menjadi pusat menjalankan aktiviti penyelidikan dan pengawasan mutu air dan ia adalah projek fasa pertama bagi pembangunan fizikal di kawasan sekitar tasik berkenaan.

Ketua Eksekutif ECERDC, Datuk Seri Jebasingam Issace John, berkata kompleks itu mempunyai tiga makmal iaitu Makmal Hidrologi dan Klimatologi, Makmal Instrumen dan Mik-

robiologi serta Makmal Analisis Air.

“Projek ini dibangunkan di kawasan seluas empat hektar sumbangan kerajaan negeri dan ia bertanggungjawab melaksanakan inisiatif penyelidikan, pengurusan, pemuliharaan dan pemeliharaan serta pembangunan ekopelancongan tapak alam semula jadi di negara ini.

#### Selaras dengan SIP

“Ia juga selaras dengan Pelan Pelaksanaan Strategik (SIP) bagi Tasik Chini yang meliputi strategi dan inisiatif utama sehingga tahun 2025,” katanya pada majlis perasmian Kompleks Makmal Air Tawar Tasik Chini, oleh Perdana Menteri, Datuk Seri Najib Razak di sini, semalam.

Yang turut hadir, Menteri Besar, Datuk Seri Adnan Yaakob; Menteri



#### Tasik Chini

- Tasik kedua terbesar di Semenanjung Malaysia
- Diwartakan sebagai Rizab Biosfera UNESCO pada tahun 2008
- Kawasan tadahan tasik meliputi hutan hujan tropika seluas 4,975 hektar

Sumber Asli dan Alam Sekitar, Datuk Seri Dr Wan Junaidi Jaafar dan Naib Canselor Universiti Kebangsaan Malaysia (UKM), Prof Datuk Dr Noorul Azlan Ghazali.

Najib yang juga Ahli Parlimen Pekan meluangkan masa lebih sejam melawat pusat penyelidikan, selain bersama masyarakat Orang Asli, pelajar Universiti Kebangsaan Malaysia (UKM) serta Universiti Malaysia Pahang (UMP) menanam 350 pokok bagi menandakan komitmen mencapai tahap kepekatan karbon dioksida yang selamat di udara.

Najib turut melepaskan anak ikan ke dalam Tasik Chini sebagai simbolik meningkatkan mutu air dan menambah bilangan ikan yang terdiri daripada spesies asal tasik itu termasuk ikan lampam dan kelah.



Tasik Chini dipelihara sebagai Rizab Biosfera Pertubuhan Bangsa-Bangsa Bersatu Bagi Pendidikan, Kebudayaan dan Saintifik (UNESCO).